



Parasgular fa tscheu e leu fastedis a catschaduras e catschadurs che fan attent che la selvaschina vegni disturbada.

FOTO ANDREAS BAUMANN

Tschella vart dalla medaglia

Sgular cun parasgularader mulesta la selvaschina principalmein sur il cunfin digl uaul. Catschadurs ed il survigilader da catscha ei en contact cun ils organisaturs digl Disentis Open, la concorrenza annuala da sgular d'igl uost, per mitigar la situaziun. Dalla vart dalla uniun Surselva Flaigers han ins tutta capientscha per las resalvas. Sfurzai da prender risguard sils giavischs da catscha e survigiladers ein els denton buc.

ANDREAS CADONAU/FMR

«Ei dat aunc in'otra vart dalla medaglia,» gi Victor Flepp che presidescha la Secziun da catschadurs Pèz Alpetta. La secziun da catschadurs da Mustér dumbra 80 commembras e commembers. Il president dalla secziun manegia cun tschella vart dalla medaglia il disturbi ch'ìls parasgularaders dil Disentis Open caschunan allas selvaschina, principalmein als camutschs. «Gia mes antecessurs al tgamun dalla secziun han adina puspei fatg attent alla problematica.» Victor Flepp tschontscha dad in bien contact cun ils organisaturs digl Disentis Open che hagein senz auter capientscha per ils fastedis da catschaduras e catschadurs. «Els san bein mitigar empau il disturbi, eliminar quel san els denton buc.»

Animals reageschan

Victor Flepp ha gia fatg stem ch'ìls animals da casa reageschan cun tema sch'in parasgularader sgola ualtr bass. «La ramur dil parasgularader e l'umbriva rementan.» Gest lu cu il parasgularaders s'avischinien datier al terren alla tscherca da termica ellas vals e spundas seigi il disturbi per la selvaschina il pli gronds, gi il president dalla secziun.

Simon Bergamin che va a catscha el territori da partenza digl Disentis Open fa attent che quei territori seigi gia frequentaus fetg dil turissem. E la massa dils parasgularaders dalla concorrenza da sgluar caschuni in disturbi supplementar. «Nus havein a Mustér dabia adherents da sgular ed els duein era saver exequir lur sport.» Tonaton ei Simon Bergamin dil meini ch'ei seigi era l'incumbensa dils catschadurs da far attent als problems. «E da s'engaschar per la selvaschina.» Era ord sia vesta ein principal-

«La ramur dil parasgularader e l'umbriva rementan.»

Victor Flepp, president
Secziun da catschadurs Pèz Alpetta

mein ils camutschs disturbai il pli fetg entras ils parasgularaders. «Per part vegnan las cauras ed ils anseuls separai e quei ei secapescha buca d'engrau als anseuls che ston silsuenter per part ceder.»

Il catschadur menziuna che la populaziun da camutschs en quei territori seigi gia per auters motivs fleivla. Victor Flepp puntuescha era che la catscha seigi buca la suletta incumbensa da catschaduras e catschadurs. «Nus prestein era lavur da tgira e sespruein dad informar la populaziun davart la selvaschina e lur moda da viver.» Alla fiasta dil vitg dalla sonda vargada ei quei stau il cass. «Nossa finamira ei da mante-

ner ina sauna fauna e flora e quei buca sulet per la catscha, mobein per plascher dalla entira populaziun.»

Ina damonda dalla beinvuglientscha

Andreas Baumann, responsabels tiegl Uffeci da catscha e pesca per la partiziun spazi da viver e proteccziun dallas spezas puntuescha ch'ìls organisaturs digl Open Disentis sco dad autras occurrenzas sportivas stoppien buca haver ina lubientscha digl Uffeci da catscha e pesca. «Ei dat da nosa vart negina basa legala per intervegnir en ina moda ni l'otra.» Reglas pli severas existan sulet per entrar en asils da selvaschinas e quellas valan buca per occurrenzas da sport ell'aria, gi Andreas Baumann. Ils survigiladers da catscha enquerien il discors cun ils organisaturs per far attent ad els als problems e nua ch'ei seigi bien da prender risguard silla selvaschina ed untgir ils territoris. «Ils organisaturs san sez decider sch'els vulan setener vid noss cusseglis ni buc.»

Ed Andreas Baumann gi ch'ei maunchi alla survigilanza da catscha las resuras da controlar con bein ch'ìls organisaturs setegnien vid ils buns cusseglis. Ch'ìl sgular cun parasgularaders influenzescha la selvaschina principalmein sur il cunfin digl uaul ei per Andreas Baumann cumprovau. «La selvaschina peglia tema e fui sur liungas distanzas.» Sin quella fugia sa ei dar accidents ni che caura ed ansiel camutsch vegnan separai. Mo era utschals che cuan ni han gest cuau ein disturbai. «In avantag per la selvaschina giuvna ei il fatg ch'igl Disentis Open sgola igl uost e buca per exempel il zercladur, lu fuss la fauna giuvna aunc pli disturbada.» Per fetg problematic vala il sgular durant igl unvier, nua ch'ìls animals selvadis ei periclitai en general il pli fetg.

«Nus sespruein da prender risguard»

Ursin Huonder da Mustér presidescha l'uniun Surselva Flaigers che dumbra 35 commembras e commembers activs. El gi che l'uniun seigi conscienta dalla problematica da disturbar las selvaschinas. «Nus informein noss commembers davart las zonas da ruuas per selvaschinas e per exempel era nua ch'ìls loghens cun ignivis da tschess se-

sanflan che nus untgin principalmein la primavera.» Las informaziuns publichescha l'uniun sin sia pagina ni era el liug da partenza a Gendusas.

«Nus essan era en contact cun l'uniun da catschaduras e catschadurs e sespruein dad anflar in consens e prender risguard.» Ursin Huonder ei era conscients che la responsabla-

dad schai la finfinala tier mintga singul ni singula parasgulara che decida ell'aria nua sgular. Ch'ìl problem ei buca pli pigns cun 100 parasgularas e parasgularaders ch'ei duront il Disentis Open da medem temps ell'aria ei era Ursin Huonder pertschats. «Il parasgular posseda denton per Mustér ina certa valor turistica.» (fmr/ac)